

AWIG-AWIG DESA ADAT ASAK



**DESA PERTIMA
KECAMATAN KARANGASEM
KABUPATEN KARANGASEM**

AWIG-AWIG DESA ADAT ASAK

DAGING BUKU :

- i . Struktur PRAJURU LAN ULUN DESA
 - ii . Sejarah Lan Pangeling Eling Desa Adat Asak
 - iii . Murdha Citta/Pemahbah
- 1 . SARGAH I : ARAN LAN WEWIDANGAN DESA
 - 2 . SARGAH II : PAMIKUKUH LAN PETITIS
 - 3 . SARGAH III : SUKERTA TATA PEKRAMAN
 - 4 . SARGAH IV : SUKERTA TATA AGAMA
 - 5 . SARGAH V : SUKERTA TATA PAWONGAN
 - 6 . SARGAH VI : SUKERTA TATA PALEMAHAN
 - 7 . SARGAH VII : WICARA LAN PAMIDANDA
 - 8 . SARGAH VIII : NGUWAH NGUWUHIN AWIG-AWIG
 - 9 . SARGAH IX : PEMUPUT

(i)

STRUKTUR PRAJURU LAN ULUN DESA

DESA ADAT ASAK



(ii)

SEJARAH LAN PANGELING ELING

Om Swastiyastu

Om Awignamastu Namó sidham

Singgih pakulun hyang parame wisesa sang sangkan paraning dumadi,hyang Bethara Bethari sane melingga melinggih ring Pura Kahyangan Tiga , mwan Hayang Pramesti guru sane melingga melinggih ring kahyangan palungguh iratu.

Mogi ulun tan kakeneng tula pamidi tan kakeneng sot sot upadrwa,kadi purun presangga atetangi ring palungguh iratu, ngutarekne ri ketatwante sang wus amungguh ring temaga wasa mwan ring lepihaning kawitan kang wus kasungung de treh.

Kawit wentene desa adat asak puniki wantah mawiwit sakeng pasikian warge asak sane sampun mungguh ring Prasasti Asak, wenten kasurat indik kawentenan desa adat asak,sane pinake manggala daweg punike mapesengan IMANGGUNGAN,IMANGINTE LAN BENDESA RANI SATRU.

Manut kadi lingging prasasti, desa adat asak ke wawe antuk I MANGINTE Lan BENDESA RANI SATRU mabiseka I MEKEL ASAK, ke dasarin antuk cor pemastu ring krame desa adat asak sane kalinggihang tur kasungkemin kewastanin tawulan, raris dane mekele kalih ka sapa Jro Mekel.

Tawulan punike kakepah taler dados ke kalih,sane kalinggihang asiki ring Jro Kanginan(BENDESA RANI SATRU), malih asiki ring Jro Kawan (IMANGGUNGAN/IMANGINTE) . Sios ring pemargi punike,tawulane taler ka tedunang rikalaning pahaci ageng ring desa adat asak mekadin ipun "Usaba Kasa

lan Usaba Kedasa" Pinaka upa saksi usaba lan acine dados kemargiang utawi kekawitin.

Rehning kawentenan jagate sampun kagentosin saking kerajaan dados panegare Republik Indonesia, kawit saking mangkin Jro Mekel Asak Kanginan lan Jro Mekel Asak Kawan Kajodi dados **PENGRAJEG** sane pinake ngemit utawi ngajegang lan mikukuhin Dresta lan Kembal(Awig-Awig) ring Desa Adat Asak kesarengin **Kelihan Adat Asak**.

Rikalaning ngemit Dresta lan Kembal(Awig-Awig) Desa Adat Asak, Pengrajeg ke sangra olih I we desa sane kewastanin **Krame Sahing** akeh ipun mpat likur diri (24 orang), sios ring krame sahing, Pengrajeg taler kapikukuhin antuk **jro Menange, Sedahan Desa Lan Daha Truna** .

Om Prenamye Bhaskara Sirase Linggam

Om Ano Badrah Kretawa Yantu Wiswa yei namo namah

lan Usaba Kedasa" Pinaka upa saksi usaba lan acine dados kemargiang utawi kekawitin.

Rehning kawentenan jagate sampun kagentosin saking kerajaan dados panegare Republik Indonesia, kawit saking mangkin Jro Mekel Asak Kanginan lan Jro Mekel Asak Kawan Kajodi dados **PENGRAJEG** sane pinake ngemit utawi ngajegang lan mikukuhin Dresta lan Kembal(Awig-Awig) ring Desa Adat Asak kesarengin **Kelihan Adat Asak**.

Rikalaning ngemit Dresta lan Kembal(Awig-Awig) Desa Adat Asak, Pengrajeg ke sangra olih I we desa sane kewastanin **Krame Sahing** akeh ipun mpat likur diri (24 orang), sios ring krame sahing, Pengrajeg taler kapikukuhin antuk **jro Menange, Sedahan Desa Lan Daha Truna** .

Om Prenamyé Bhaskara Sirase Linggam

Om Ano Badrah Kretawa Yantu Wiswa yei namo namah

(iii)

MURDHA CITTA

Om Swastiyastu

Om Awignamastu Namoh Sidham

Purwa pangastungkaran tityang Krame Desa adat Asak ring buk padan Ida Shang Hyang Widhi Wasa, dwaning melarapan saking kretha wara nugraha Paduka Bhatara Samodaya, karya panyuratan Awig-Awig Puniki prasida puput.

Kaping kalih atur pangayubagyan tityang Krame Desa Adat Asak, ping ajeng ring dane para nayaka praja, Pemangku, minekadi dane sane merage Cestakara, Widagdha Prajnyan Wicaksana sareng sami, Pamekas putusing Pasaban Desa Adat Asak gumawe Awig-Awig Desa Adat maka spat siku siku pamatut, wastu prasida prayojanan kabeh angidep amagehaken mwah amolah prawerti kadi linging Awig-Awig iki.

Taler majeng ring Pemerintah Propensi Bali, sane kasurat ring Peraturan Gubernur no.14 tahun 2019, tityang ngaturang pangayu bagya dwaning sangkaning paweweh punika Awig-Awig puniki prasida kasuratang.

Majeng ring Pemerintah Kabupaten Karangasem, para manggala sane sampun pastika ngiwang patutang Awig-Awign, naler tityang ngaturang pangayu bagya, dwaning sampun kasidan nureksa maritetes saha mastikayang kantos marupa puput.

Om Santih Santih Santih Om

SARGAH I

ARAN LAN WEWIDANGAN DESA

Pawos 1

- 1 . Desa Adat Asak Puniki mawasta Desa Adat Asak
- 2 . Jimbar kakuwub wewidangan nyane nyatur mekadi ;
 - a.sisi lor utawi kangin,panepi kelod desa adat bungaya
 - b.sisi wetan utawi kangin,panepi kauh desa adat subagan
 - c.sisi kidul utawi kelod,panepi kaler desa adat timrah
 - d.sisi kulon utawi kauh,panepi kangin desa adat tenganan
3. Desa Adat Asak puniki kewangun antuk karang desa utawi gebogan krame,-, turmaning kepeah dados kalih banjar adat luire :
 - a.Banjar adat asak kangin
 - b.Banjar adat asak kawan
4. Wawengkon Desa Adat Asak sampun manut kadi kawentenan Tri Mandala-luir ipun mekadi;
 - a.Utama Mandala : Linggih Parahyangan
 - b.Madya Mandala : Genah pupulan karang paumahan,telajakan desa,-rurung,margi,jlinjing lan sapenunggilanya
 - c.Nista Mandala : Setra.

SARGAH II

PAMIKUKUH LAN PATITIS

Pawos 2

Desa Adat Asak ngrajegang ,mikukuhin,kalih mitindihin pisan;

- a. Pancasila
- b. Undang-Undang Dasar 1945
- c. Tri Hitta Karana

Pawos 3

Desa Adat Asak ngemanggehang patitis luwir ipun;

- a. Ngrajegang Sanghyang Agama
- b. Tata prawertin me agama
- c. Ngrajegang Kasukertan Desa saha Pawongannya sekala lan niskala
- d. Ngawrediyang kawicaksanayan minakadi kaprajnyan maka larapan mangguh gemuh landuhing praja
- e. Ngamanggehang miwah ngawrediyang padruwen desa, mejalaran kawicaksanan guna laksana manut Dharma Prawreti.

SARGAH III

SUKERTA TATA PAKRAMAN

Palet 1

Indik Krama

Pawos 4

1 .Sane kebawos krama desa adat asak,inggih punike keluawarga sane ma agama hindu san

megenah tur jenek ring wewidangan desa adat asak lan sane ring dure desa lan dure negara sane kantun me banjar adat lan me desa adat sane kesungkemin antuk kelihan banjar adat- lan klihan desa adat (bendesa adat).

2. Sejaba punika kasinanggeh Krama tamyu sane kakepah dados kekalih, inggih punika sane me- Agama hindu miwah sane me agama siosan ring agama hindu.

Pawos 5

PEPALIHAN KRAMA DESA ADAT ASAK KADI RING SOR PUNIKI :

1. Krama Saing

Krama Saing inggih punika karma sane mawiwit saking karma Desa Nyoman sane nganggen giliran tegak nganten ke ambil pat likur diri (24 orang) sakeng dulu nagtebenang tur sampun mesih (mewinten pabersihan raga sekala niskala).

2. Krama Desa Nyoman

Krama Desa Nyoman inggih punika krama sane sampun polih pecatu utawi gantalan mawiwit-saking desa adat asak tur jenek magenah ring desa adat asak.

3. Krama Desasabu

Krama Desa Sabu inggih punika krama hindu sane sampun merabian (bulu angkep) miwah krama lanang lan istri sane sampun pasah merabian (bulu aneh) lan truna tua (truna tawing) sane jenek tan jenek ring wewidangan desa adat asak.

4. Krama Desasabu Tamyu

Krama Desasabu Tamyu inggih punika karma saking dura desa sane jenek ring sajeroning pale mahan desa adat asak mewaneng limang tiban utawi limang warsa (5 tahun) tur sampun ka ili kitayang .

5. Krama Tamyu

Krama Tamyu inggih punika;

- a. krama sane jenek magenah ring wewidangan desa adat asak yan nenten me agama hindu tan kesarengang sa polah palih agama hindu.

- a. Krama sane ngajag rawuh ka jroning desa adat asak, nanging nenten netep magenah irika-sajeroning arahina ring awengi, sang ngraksa patut nguningayang ring prajuru desa, kalih – ring sang amawarat. Yan tan sapunika prajuru desa adat wenang nundung jadma inucap-mangda matinggal saking desa adat asak.

5. Krama Ngarep

Krama sane melarapan wed mawiwit saking desa adat asak sane sampun bulu angkep tur – sampun mawidiwidana jenek tan jenek ring desa adat asak.

6. Krama Nyada

Krama sane sampun megat ayahan, sakemawonkagentosin antuk sentanannya tur sampun-metruna adat.

7. Krama Pangele

Krama sane sampun nenten keni ayahan ring desa luire:

- a. Mabukti sungkan rahat tur tan sida waras
- b. Antuk lingsire sampun meyusa 70 warsa.

8. Krama Balu

Krama sane sinalih tunggil rabi utawi istrine lina wiyadin nyapihan :

- a. Balu Makrambian, punika balu sane madruwe sentana durung merabian
- b. Balu Nglisting, punika balu sane tan madruwe sentana.

Pawos 6

1. Ngawit Dados Krama Desa Adat Asak:

- a. Sangkaning ngemong karang desa lan sane siosan manut perarem
- b. Kula warga sane sampun merabian mejalaran antuk pawiwahan/mawidiwidana
- c. Kulawarga sane ngawit jenek magenah ring sajroning palemahan desa adat asak mawaneng 3(tigang) sasih utawi 105 dina tur sampun ka ilikitayang
- d. Krama desa wed saking desa adat asak, matinggal kadura desa wastu mewali malih ka desa-adat asak :

1. Yan sangkaning rahayu kalih kalugra saking Prajuru Desa patinggale nguni, wenang malih – mipil ring sinalih tunggil banjar sane wenten ring desa adat asak, nganutin sukertan banjar soang soang

2. Yan sangkaning tan rahayu patinggale nguni, yogya kliang banjar sane katuju ngatengah – ang babawose ka Desa, mangde kabawosin antuk Prajuru Desa Adat Asak, prasida mipil ka lugra pinaka karma desa adat asak.

2. Panemaya Tedun Lan Usan Makrama Saing:

a. Rikalaning sinalih tunggil Krama Saing wenten kalayusekaran/padem

b. Nyabran Sasih Kasa saha mejalaran antuk tategenan arep ring karma sane ngemongin ayah-an desa tur sane sampun Mesih

c. Ngawit pawiwahan nenten ngawilangin warsa ipun

d. Pagilihan tegak dados Krama Saing kdasarin antuk tegak nganten/pawiwahannya

e. Jro Menange, Pemangku Kahyanga Tiga, Sedahan, Sрати, rikalaning keni giliran ma Krama - Saing nenten katedunang ma Krama Saing.

f. Pengrajeg, Kliant Desa Adat Lan Penyarikan Adat nyaning keni giliran ma Krama Saing nenten katedunang ma Krama Saing

g. Krama sane Cacad Angga, lanang utawi istri nenten kadadosang ma Krama Saing

(Sane kasinanggeh Cacad Angga : Peceng, Buta, Bongol, Cungik, Perot, Jeriji Perut lan Dimpil)

h. Sane Cacad Angga rikalaning jagi keni giliran ma Krama Saing, sadurung ka arahin karawuhang dumun ka Pengrajeg Desa jagi ka icen pawarah warah

i. Krama Desa Nyoman sane cacad angga ritatkala pagentosan utawi pagilihan pacang mung-gah dados Krama Saing, Gantalan Desai pun ka cabutin

j. Krama Saing sane nunas bawos mararean wiyadin kabawosin majalaran sangkaning sungkan-yen wantah sampun patut, dados nunas maraeon, sakewanten gantalan Pauman lan Des aka cabutin

k. Sinalih tunggil Krama Saing sane nunas mararean makrama saing sakewaten nenten manut-

panglokika Pangrajeg lan Prajuru, kausanang ma Krama Saing, gantalan Pauman lan Desa kacabutin

l. Yaning sinalih tunggil weten Krama Saing sane mabukti melaksana tan patut, kausanang – dados Krama Saing tur gantalan Pauman lan Desa kacabutin

m. Yening wenten sinalih tunggil Krama Saing padem utawi kalayusekaran, keni iwang mantuk ring pariksaana, kausanaang dados karma saing, yadiastun tegake saampun di Dulu wiya din di Teben, gantalan Pauman lan Desa kacabutin, Sakewanten Tanggunganipun nenten kausanang raris kagentosin manut pagilihan sane tedun ma Krama Saing, manut akeh sane padem lan kausanang

n. Krama Saing sane nenten nyarengin Sangkepan Desa ngantos ping tiga maruntutan, kausanang dados Krama Saing tur gantalan Pauman lan Desa kacabutin

o. Sane sampun munggah Makrama Saing nenten ladadosang magotra, ngranjing nyarengin utawi ngamiletin sakaha sakaha sane wenten ring wawidangan Desa Adat Asak

p. Yan sampun tegake rauh De Bahan mawaneng tigang warsa, usan dados De Bahan, ka bawos dados De Salah

q. De Salah polih pecatu utawi gantalan desa ngantos usan ngauk.

3. Usan Dados Krama Desa Adat:

a. Sangkaning Padem/Seda/Kalyusekaran

b. Sangkaning pinunas ngeraga riantukan kesah kadura desa saha polih palugrahan saking Prajuru desa (klian desa)

c. Kasepekan saha Kanorayang duwaning sampun tan prasida ngesehin salah, tur maprawerti stata nguwug kecaping awig awig

d. Metilar utawi tilar saking Agama Hindu

e. Patut ngantukang utawi ngewaliang ayahan ka desa

f. Tan polih pasayuban utawi pitulung sajroning hala ayu

g. Tan polih pahpahan utawi pa dum duman saking padruwen desa

h. Sane wusan makrama sangkaning rahayu, prade riwekas matulak mawali makrama desa, - mangden masadok ring Penyarikan Desa, yan mamurug keni pamidanda manut perarem - Prajuru Desa Adat

i. Yening usan makrama desa adat sangkaning tan rahayu, prade riwekasan matulak mawali ka esa Adat, patut karawuhang ka desa saha kabawosin ring Prajuru Desa Adat.

Pawos 7

Tategenan utawi Swadarmaning Krama Desa Adat Asak:

1. Tategenan Krama Desa Adat Asak:

- a. Krama Saing, keni tategenan manut dresta aci desa
- b. Krama Desa Nyoman, keni tategenan manut arahan desa
- c. Krama Desa Sabu, keni tategenan manut ring arah arah desa
- d. Krama Ngarep sane polih gantalan, keni tategenan mamungkul manut arahan desa
- e. Krama Balu Nglisting, Krama Balu Nyapian, Krama Balu Makrambian, yening balu lanang keni-ayahan lanang, yening istri keni ayahan istri manut arahan desa
- f. Krama DE Salah, keni ayahan nguk manut dresta
- g. Krama Desa Adat wed, ngarep sane maduwe oka lanang utawi istri sane sampun mayusa 17-warsa rikalaning desa adat Ngepikang Daha lan Nedunang Teruna Adat, sejabaning cedangga, yen polih arahan saking desa adat mangden sida tinut saturut ring arahan Desa, yen mamurug keni danda Artha mapengarga 100 kg beras
- h. Krama Desa Lanang sane 3 keni arahan Mteruna Adat nenten tedun materuna, ring sampune Marabian nenten kasarengang ma Pauman
- i. Krama Desa Istri sane keni arahan ma Daha nenten tedun ma Daha ring sampune Marabian-enten polih ilakita lan upa saksi Klian Desa Adat lan Klian Banjar
- j. Ayahan Teruna luwire Ngampag rikalaning aci Kuningan, Mabuang rikalaning aci Kasa, yen nenten tedun ngayah sajabaning sungkan keni danda artha mapangarga 10kg beras
- k. Ayahan Daha Adat luwire Malelawang, Mendet, Ngrejang lan Ngabuangin Sumbu, Mesindi-

han yen nenten tedun ngayah sajabaning sungkan keni pamidanda artha mapangarga 10kg beras

l. Penyarikan Teruna Adat, Klian Teruna Adat, Subak Daha, tan dados ngetut ayah ayahan kakenen utawi papeson antuk artha brana sane kamanggeh Dharma muah Dresta, ayah ayah inucap tan dados kagentosin antuk artha brana, yan mamurug keni danda mapangarga 50kg beras.

m. Krama sanew maduwe oka Makelihan utawi Masubak Daha rikalaning keni Sumbu utawi – ngawangunang Sumbu, kaicen wantuan jinah saking Desa Adat manut perarem Prajuru

n. Krama Desa Adat sane maduwe oka Makelihan utawi Masubak Daha, ryen nenten ngamedalang utawi ngawangun Sumbu keni danda 100kg beras

o. Krama Desa Adat sane keni ngamedalang/ngawangun Batang ring Pahaci Kawulu, nenten – ngamedalang/ngawangun Batang, keni danda 100kg beras

p. Krama Desa Adat ngantos pang 3 (tiga) saturut nenten ngamedalang/ngawangun Batang – lan Sumbu, jagi kakenening sangsi adat manut perarem Prajuru DEsa Adat

q. Aci Galungan ring rahina penampahan Galungan, ngawangun Penjor, manut pagilihan rurung, Aci Kasa lan Aci Kadasa krama sane polih gilihan ngawangun Tunggul patut ngawangunang-tunggul, yan mamurug keni danda 50 kg beras, sajabaning kapialang sungkan kacuntakan utawi kalayu sekaran mangda nyerodang nyadokang manut pagilihan nyane

r. Rikalaning Ida Bhatara jagi Malasti ke segara nuju Usaba Ka Dasa, krama sane keni uduhan – mangden satinut ring arahan Desa, yan mamurug keni danda 10kg beras

s. Sang sapasire ugi krama desa adat tan kalugra ngamedalang bawos sugal miwah nguman uman, yan mamurug keni danda manut perarem Prajuru Desa adat

t. sang sapasire uggi krama desa adat tan dados melaksana, ngawetuang biyota, yan mamurug keni danda manut perarem Prajuru Desa Adat.

2. Swadarmaning Krama Desa Adat Asak:

a. Krama Ngarep sane polih Gantalan, yoga keni ayah ayahan, tata turun cumek, nyanggra se-raja karya desa, manut ungguan soang soang 8

- b. Krama Sesabu yogya ngaromba saraja karya sane kapucukin antuk krama ngarep, yan wenten pabuat saking Desa jagi kahunadikayang antuk Prajuru Desa Adat
- c. Krama Tamyu sane ma agama Hindu yogya ngaturang panahub ka desa nga masa masa, - gung artha mapangarga 20kg beras
- d. Krama Tamyu sane nenten ma Agama Hindu tan sareng sapalikramaning Agama, nanging-tan wenang piwal ring Awig awig, paswaran Desa miwah pamutus perarem Desa, sane ngin dikang tata pawongan miwah palemahan. Patut ngaturang panahub namasa masa manut - pangangan beras 100kg
- e. Krama DEsa Adat Sinamian yogya saturut ring daging Awig awig Desa Adat Asak, paswaran- miwah pamutus perarem Desa, ngutsahayang mangda kasidan mapikolih sakadi patitis tatu jon desane inucap ring ajeng, manda sida tumus ngamangguhang kajagaddhitaning Praja
- f. Krama Desa Adat sane pacang ngadol, ngantahang, maselangang, majegang, masewayang, m- makedihang palemahan carik, tegal, palasan miwah sane siyosan sane magenah ring sajro - ning wewidangan desa adat asak, ugi mangda polih palugrahan saking Prajuru Desa Adat A- sak, yan tan polih palugrahan yogya indike punika ka andegang.

3. Krama Tamyu:

- a. Krama Tamyu sane ma Agama Hindu sane sampun jenek magenah tigang sasih utawi 105 di na ring Desa Adat Asak, keni jinah pangepok utawi pamogpog artha mapangarga 100kg be- ras, lan selantur nyane nginutin ayahan Desa Adat
- b. Krama Sasabu Tamyu patut nyadokang raga saha kailikitayang ring banjar dinas miwah ring Banjar Adat, sajawaning sane kapituduh ring sang Amawa Rat, yan mamurug keni danda - Artha mapangarga 100kg beras, yan mamurug nenten naur danda, ngantos ping tiga keni a- arahan saking Desa Adat, krama inucap patut katundung saking Desa Adat Asak.

4. Tamyu:

Sang sapisire ugi tamyu sane rauh ke Dsa Adat Asak ngrereh karya, patut keni pamahayu manut Perarem Prajuru Desa Adat Asak

Pawos 8

Palapeksa Desa Adat Asak:

1. Krama Desa Adat Asak patut polih wantuan marupa pitulung ring sajeroning katiban pancabaya
2. Krama Desa adat Asak sinamian, sajaba tamyu yogya polih pasayuban saking Desa Adat, salewiring wyawahanya, yogya kabawosang saking Prajuru Desa Adat manut tata titining wicara
3. Krama Desa Adat asak sinamian sane ma Agama Hindu, sajabaning tamyu, wenang nglaksanayang Panca Yadnya sajeroning Desa Adat Asak, manut desa Kala Patra, sastra Agama, miwahnganutin Dresta utawi Siman Desa inucap
4. Krama Desa Adat Asak wenang polih babagian layuban aci aci, salwiring ipun twas twasan miwah siosan, sane patut katrima ring Krama Desa Adat manut Dresta
5. Mapuangkid, nyaluk tan tedun ma ayahan yogya sangkaning panglokikan kalih palugrahan – Prajuru Desa Adat.

PALET 2

PENGRAJEG, PRAJURU LAN DULUN DESA

Pawos 9

1. Desa Adat Asak Ka enter antuk Pengrajeg, Kelihan Desa Adat kasarengin Prajuru Desa, Sabha Desa Adat, Kertha Desa Adat, Banjar Adat miwah tempekan, sekaha sekaha lan Dadie Dadie,
2. Pengrajeg kasangra antuk:
 - a. Krama Sahing
 - b. Sedahan Desa
 - c. Menange
 - d. Daha lan Teruna Desa Adat.

3. Klihan/Kliang Desa Adat Asak kasangra antuk:

- a. Prajuru Desa Adat (Petajuh, Panyarikan, Patengen)
- b. Banjar Adat Asak kangin lan Banjar Adat Asak Kawan
- c. Pemangku Kahyanga Tiga
- d. Jro Menanga
- e. Kelian Teruna lan Subak Daha
- f. Penyarika Desa Adat
- g. Kelian Gong
- h. Kelian Pecalang
- i. Kelian Subak Sane wenten ring wewidangan Desa Adat Asak/Pekaseh
- j. Kelian Banjar Dinas sane wenten ring wewidangan Desa Adat Asak
- k. Saya Desa lan sekaha sekaha, tempekan miwah dadia dadia.

Pawos 10

1. NGADEGANG PENGRAJEG, CALON KELIHAN DESA ADAT UTAWI PARJURU DESA ADAT:

A. Ngadegang Pengrajeg Desa Adat Asak:

Pengrajeg manut Dresta sane sampun kasungkemin mawiwit saking Jro Kanginan lan Jro Kawan Desa Adat Asak maduluran saking sane kasudi ring Jro soang soang ingih punika – Asiki saking jro kanginan lan asiki saking jro kawan.

B. Ngadegang Kelian Desa Adat Utawi Prajuru Desa Adat Asak:

1. Mawiwit saking Krama Ngarep tur Jenek tan Jenek ring Desa Adat Asak sane sampun mjangkepan kadulurin antuk mawidi widana
2. Maduluran antuk pemilihan musyawarah mufakat olih paruman panitia nyabran 5 (lima) warsa, dados kajodi malih utawi manggeh apisan.
3. Maduluran saking upacara pabersihan magenah ring Pura Bale Agung/Pura Desa
4. Sang sane ka adegang dados calon Kelian Desa Adat kawentenannya kakalih, mawit sa-

king Banjar adat Asak Kangin Asiki, Banjar Adat Asak Kawan Asiki.

5. Kelihan Desa Adat sane kajodi/kasudi mangda ngarereh wakilnya saking Banjar Adat Asak siosan (banjar adat asak kangin utawi banjar adat asak kawan)
6. Penyarikan miwah Patengen kasudi olih Kelian Desa Adat
7. Sane kedadosang Kelihan lan Petajuh Prajuru, inggih punika Kelian Desa Adat lan Petajuh-pinaka wakilnya Kelihan Desa adat
8. Rikalaning jagi kawentenang pemilihan Kelihan Desa Adat, Mangda ka adegang prawarta Ka (panitia) pemilihan Kelian Desa Adat sane ka pilih olih Kelihan Desa Adat tur kasobyahang ring perarem Sabha Desa Adat/Krama Desa Adat.

C. Uger uger Ngadegang Calon Kelihan Desa Adat Asak:

1. Maduwe ljasah manut perarem prawartaka pemilihan Kelian Desa Adat
2. Surat Keterangan Berkelakuan Baik saking Kepolisian Republik Indonesia
3. Surat Keterangan Sehat saking Dokter
4. Maduwe KTP saking Ke Desaane sane kantun manggeh
5. Nenten naen keni sangsi saking desa adat miwah saking banjar adat
6. Myusa pinih alit 40 (tigang dasa) warsa lan pinih ageng 60 (nem dasa) warsa
7. Uger uger puniki taler pateh ka anggen ring sane pacang ka adegang dados Petajuh.

Pawos 11

1. Swadarmaning Pengrajang Desa Adat Asak

- a. Ngrajegang sadaging Dresta, seni, tradisi lan budaya desa adat
- b. Nuntun Krama Desa adat Ngudpadi Kasukertan Desa Adat
- c. Mawosin kalih niwakang pamutus kasarengin Kelihan Desa Adat ring Krama Saing, Jro Mena nga, Teruna lan Daha desa adat
- d. Ngemargiang Swadarmaning Kelihan Desa Adat ri sampune jagi puput ayah paling gelis 3 - (tigang) sasih sedurung puput ngayah dados Kelihan Desa Adat melarapan antuk Serah Terima Jabatan

Pawos 12

2. Swadarmaning Kelihan Desa Adat Asak lan Prajuru Desa Adat Asak:

- a. Ngerajegang sedaging Awig awig miwah Perarem Desa Adat
- b. Nuntun Krama Desa Ngudpadi kasukertan Desa Adat
- c. Mawosin kalih niwakang pamutus majeng ring wicara Krama Desa Adat
- d. Maka duta matemuang bawos ring sapasire ugi
- e. Prade Prajuru Desa Adat mamurug ring kecaping Awig awig utawi iwang panglaksana-
keni pamidanda utawi dedisan nikel ring kaiwangan Krama Desa adat saha kararianang
manut pamutus paruman Desa Adat
- f. Sajeroning ngenterang pemargin Yadnya, Kelihan Desa adat kasarengin antuk Prajuru Desa
- g. Nglaksanayang swadarma sane kapica saking Sang Amawa Rat (Pemerintah)
- h. Kelian Desa Adat wenang nanging langlang desa utawi Pecalang Desa Adat.

Pawos 13

3. Patias Utawi Olih olihan Pengrajeg, Prajuru Desa miwah Kelihan Desa Adat:

- a. Luput Rerampen (Papesuan)
- b. Upon Pecatu utawi Palaba Carik
- c. Patias siosan manut perarem
- d. Pengrajeg, Kelihan Desa Adat, Petajuh, Penyarikan/Sekretaris, bendahara, Jro Menange, Seda-
han, Jro Mangku Kahyangan Tiga lan Krama Saing luput ring ayah ayahan Banjar Adat.

4. Prajuru Desa miwah Kelihan Desa Adat kagentosin utawi usan mejalaran:

- a. Seda utawi Kelayusekaran
- b. Kararianang utawi kausanang duwaning iwang pamargi utawi nilar sesana

- c. Mapinunas sangkaning rahayu sesampune polih lugraha pamutus paruman Prajuru lan Pengrajang Desa
- d. Majalaran tutug senger pengadegane
- e. Mabukti sungkan rahat suwe, ngantos tahunan minakadi tan prasida ngemargiang swadar maning Kelihan Desa Adat/Prajuru.

PALET 3

INDIK SANGKEPAN MIWAH PARUMAN

Pawos 14

*1. Indik Sangkepan Miwah Paruman Ring Desa Adat Asak :

- a. Sangkepan Krama Saing kamargiang nyabran nga sasih magenah ring Blae Agung, kaenter - olih Penyarikan Desa, sanunggil Pinanggal pang nem
 - b. Sangkepan Dewa kamargiang nyabran ngsasih nuju pinanggal ping pitu nemu kajeng kadulu rin antuk Ngauk olih De Salah Desa
 - c. Paruman Prajuru kawentenang manut swegina magenah ring Bale Agung kaenter olih Kelian Desa Adat
 - d. Sangkepan Banjar utawi Pauman kawentenang manut pabuat magenah ring banjar utawi pauman soang soang kaenter olih Kelian Banjar utawi Kelian Pauman manut kadi arah arah
 - e. Paruman Desa Sabu kawentenang manut pabuat utawi wicara, lan sampun pastika kemargiang ngawarsa apisan Ngrawuhang indik munjuk lungsurin Padruwen Desa
 - f. Sangkepan Sekaha Pasukadukaan miwah sane lianan kamargiang manut pabuat lan pamutus Pararem soang soang.
- .Sangkepan, Paruman Desa utawi banjar madudonan sekadi ring sor ;
- a. Prasida kalaksanayang risampun katedunin antuk sang patut ngamiletin, kamanggala antuk tengeran kul kul miwah mabusana adat, saha tan kalugra makta gegawan sakaluwire tan - maren ngarcana Ida Bhagawan Penyarikan maka sarana Widi Widana Cane
 - b. Pangawitr jagi ngamargiang sangkepan pinirihin nyacak krama

- c. Tan kalugra ngawetuang suara gora utawi biota. yan wenten asapunika keni danda acamil – gung artha mapangarga 50kg beras
 - d. Pamutus bawos briyuk sapanggul kadulurin antuk musyawarah mufakat punika sane kamanggehang
3. Prade tan puput bawose sajeroning sangkepan ngantos pang tga sangkepan, patut katengahang utawi kajeroning paruman Kertha Desa Adat pinaka pamutus wicara
 4. Sangkepan Krama Saing magenah ring Bale Agung, Sesampune malinggih ring Bale Agung- mangda rambute megambahan, nenten dados ngangge kuwace, nganggen destar, sasungklite kagenahang saha maprani. Asapunika taler ring saya desa sane ngayahin.

Pawos 15

1. Sajeroning paruman Desa, Kelihan Desa Adat Adat patut nyobyahang pamargin ngenterang Desa pamekas ngenenin indik:
 - a. Munjuk lungsurin pakraman dsha ayah ayahan sulur artha brana druwen desa
 - b. Panglaca laca Prajuru ngenenin usaha Pacingkreman padruwen Desa kapungkur.
2. Pamutus paruman desa sinanggeh **Pararem** maka pamitegep pamargin Awig awig.

Pawos 16

1. Sangkepan Prajuru Desa kawenangang ngerincikang usaha desa kapungkur
2. Sangkepan Prajuru Desa tan kawenangang ngamedalang tategenan ring Krama sadurung Ingkupin Krama Desa.

PALET 4

INDIK KULKUL

Pawos 17

1. Kulkul ring Desa Adat Asak luwire:
 - a. Kulkul Dewa ring Busali

b.Kukul panangguran ritatkala Ida Bhatara tedun

c.Kukul Desa utawi Kukul Krama Sahing

d.Kukul Teruna

e.Kukul Pacalang

f.Kukul Banjar Adat utawi Kukul Tempekan

g.Kukul Sekaa Pasukadukaan utawi sane siyosan

2.Suwaran Kukul Nganutin "Tri Bratha Sandhi" iingih punika :

a.Dharma : suwaran kukul nganutin upacara utawinupakara agama

b.Sima : Suwaran kukulnganutin dresta sane kemanggehang

c.Laksana : suwaran kukul nganutin sawatek pakaryan sane kalaksanayang antuk desa, pauman lan banjar.

3.Tabuh tatepakan kukul desa:

a.Atuludan banban,tatengeran tedun ngayah

b.Atuludan baban ping tga,tatengeran kukul buhung utawi wangde

c.Tatepakan kukul banjar utawi pauman pateh ring kukul desa rikalaning patetdunan ngayah miwah sangkepan.

4.Tatenggeran Kukul ring soang soang banjar:

a.Pitung tuludan ban ban ping tiga tatenggeran kukul anak padem utawi kelayusekaran

b.Limang tuludan ban ban ping tiga tatenggeran kukul nganten utawi ngarorod

c.Atuludan blus tatenggeran kukul kapancabaya.

Pawos 18

1.Kukul desa utawi banjar tan wenang katepak,yening tan sangkaning pituduh prajuru desa-utawi banjar sawawaning tatenggeran kapancabaya

2.Kukul sane nenten dados katepak olih krama sane nenten wenang inggih punika,
(Kukul Dewa,Kukul Panangguran,Kukul Desa lan Kukul Teruna)

3.Sang sapisire sane pacang nepak kukul banjar utawi kukul sekaaa sekaaa rikalaning wente

Pancabaya nenten perlu malih masadok ring pengurus banjar utawi sekaaaa sekaa

4. Nenten kedadosang nepak kulkul desa, banjar, sekaa sekaa yan tan kapituduh olih prajuru desa

Banjar lan sekaa sekaa, prade mamurug kakeniin danda 100kg beras

5. Tatengeran kulkul patut katedunin manut daging arahan, yan mamurug keni danda manut pa-
buat lan pamutus pararem.

PALET 5

INDIK DRUWEN DESA

Pawos 19

Padruwen Desa Adat Asak kadi ring sor puniki :

A. Pura Kahyangan Desa Adat Luwire :

1. Pura Kahyangan Tiga (Pura Puseh, Pura Desa lan Pura Dalem)
2. Pura Ibu Desa
3. Pura Ulun Suwi utawi Pura Pangulun Subak
4. Pura Melanting
5. Pura Muter
6. Pura Tumenang utawi Pura Segeha
7. Pura Dalem Alit
8. Pura Pangulun Stra Utwi Pamuwun
9. Pura Praja Pati
10. Pura Beji Pasucian Tirta Pawitra ring Yeh Inem
11. Pura Beji Tiyagan
12. Pura Bedugul

B. Palemaha Desa Luwire:

1. Tanah tegak kahyangan
2. Tanah ayahan Desa

3. Tanah Karang Desa

4. Tanah tegak Pasar desa lan Tanah tegak Wantilan Desa (Bale Saba)

5. Tanah telajakan Desa

6. Tanah Setra : Setra ageng, Setra Alit, Setra Pamuwun.

C. Tanah Palaba Pura Kahyangan Desa miwah tanah padruwen Desa siosan manut lekita.

D. Lelangunan utawi ilen ilen Pdruwen Desa:

1. Selonding, Gambang, Gong Gede, lan Gong Semar Pagulingan

2. Ngerampag, pelawangan Truna, Pelawangan Daha, Rejang, Pendet, Abuang Truna, Abuang-Mamuja Daha, Abuang Desa Nyoman, Abuang Desa, Abuang Saya, Gebug Ende, Nyeraman, - Sanghyang, Kidung Wali miwah Nyasa lan Sasanti sane siosan.

E. Ilakita ilakita luwire: Pipil, Sertifikat, Awig awig, Prasasti miwah sane siosan.

F. LPD miwah sakeluwiring usaha sane kadruwen antuk Desa , manut perarem.

G. Olih olihan Desa Adat Asak :

1. Olih olihan saking palaba Pura

2. Urunan saking Krama Desa Adat

3. Paican saking Guru Wisesa

4. Aturan Punia siosan sane patut

5. Dedosan lan panawur pananjung batu saking krama

6. Olih olihan saking upeti Desa

7. Piolihi olih saking LPD, Pasar Desa miwah usaha siosan sane kadruwen Desa Adat.

Pawos 20

1. Pengrajeg, Klihan Desa Adat, Penyarikan Desa, Debahan, lan DeNgempat wenang ngetangang Pamupon Palaba Pura lan sapanunggilan Druwen Desa.

2. Pikolihi lan Pamuponnya kaanggen prabeya piodalan lan wewangunan ring Desa.

3. Nyabran ngasasih pesangkepan Krama Sahing, pangamong druwen Desa ngawentenang indit
Munjuk lungsurin padruwen Desa.

4. Sakeluwiring Padruwen Desa patut wenten lekitanya.

5. Tan kalugra ngadol druwen desa yan tan kasungkemin antuk Krama Desa.

PALET 6

INDIK LELUPUTAN MIWAH DADOSAN PATEDUNAN

Pawos 21

1. Luput paturunan miwah papesonan punika mateses tan keni paturunan miwah papeson sake-
luwir ipun ritatkala Desa Adat ngewentenang pahaci aci sakeluwiringsane dados emponan –
Krama Desa sareng sami.
2. Sane Luput paturunan utawi papeson luwire : Pengrajeg, Klian Desa, Petajuh, Penyarikan, pate-
ngen, DeBahan, DeNgempat, Sedahan, Pemangku Kahyangan Tiga, Pekayuhan lan Klian Gong.
3. Sang sapisire ugi sane kapineh antu Desa patut nyandang polih leluputan manut paswaran
Desa.

Pawos 22

Dadosan Patedunan, Sangkepan, tedun mekarya miwah sane tiyosan nganutang sukertan soang
Soang luwire:

1. Yan Prajuru Desa madruwe patedunane, yogya nganggen sukertan Desa, dedosane ngranjing-
ke Desa.
2. Yan Bebanjaran madruwe patedunane, yogya ngangge uger uger sukertan Bnajar, dedosane –
ngranjing ke Banjar.
3. Yan Truna Madruwe patedunane, yogya ngangge uger uger sukertan Truna, dedosane ngrsn-
jing ke Truna.
4. Yan sekaa sekaa madruwe patedunane, yogya ngangge uger uger sukertan sekaa, dedosane –
Ngranjing ke Sekaa.
5. Rikalaning ngayah patedudnan, sangkep utawi parum, prade wenten sinalih tunggil krama ma-

tilar, sadurung puput karya, inekadi durung puput sangkepane, patut krama inucap keni dedo san pateh kadi krama sane tan tedun, sajawaning sampun polih lugraha saking prajurunya soang soang.

6. Yan wenten krama sinalih tunggil tan tinut ring tatepasan miwah dedosan punika, wenang bebawose katengahang ke Prajuru, Paruman Desa yogya niwakang pamutus.

7. Dedosan Sangkepan, Patedunan, manut pangargan beras, maetang pangargan beras duk rahina Sangkep utawi patedunan, agung alit dedosane manut paswaran Desa utawi Banjar lan Sekaa Soang soang.

PALET 7

PANYANGGRAN BANJAR

Pawos 23

1. Seraja Karya Banjar, kesanggra antuk Banjar soang soang, kaenter antuk Klian Banjar inucap.
2. Seraja Karya Desa, wenang keanggra antuk Krama Desa, kaenter antuk Prajuru Desa Adat.

PALET 8

INDIK BAYA

Pawos 24

1. Sang kinucap Pancabaya luwir ipun : Gni Baya, Jiwa Baya, Toya Baya, Artha baya, lan bayu Baya.
2. Saklewiring Baya wenang gegerak antuk suwaran kulkul.
3. Prade ring Desa wenten ke pancabya, patut desane ngawentenang Panyangaskara manut panglokika.
4. Yan wenten Krama manggihin maling tan nyadokang ring Prajuru, jantos jadm sios nyadokang, patut kadanda manut perarem. Yan kantos ping tiga melaksana asapunika wenang kasukserahang ring sang ngawiwenang.
5. Yaning wenten krama ngranjing kepakubon utawi pekarangan rikala suung, mewastu sang Madruwe karang ke icalan, wenang krama inucap kasinahang antuk madewa saksi ring Pura

Bale Agung.

6. Krama Desa Sane pacang ngranjngkapekubon wiadin pekarangan patut matengeran suwara utawi mekawukan, nyantos sane nruwenang karang rauh. Prade tan wenten nyawurin, mangde mesadok ring pisaganya, utawi pamedal karange kasawenin, makacihna mapengarah.

SARGAH IV

SUKERTA TATA AGAMA

PALET 1

INDIK DEWA YADNYA

Pawos 25

1. Indik kahyangan:

- a. Pura pura sane kadruwen Desa Adat asak ka empon antuk Desa Adat, indik pangaci aci manut kuna dresta, gegaduhan kalih pasuwaran Desa Adat Asak
- b. Pura pura kahyangan siosan sane kinucap ring ajeng, papyon kalih pangaci aci kaempon – antuk krama sane ngemong pura inucap
- c. Mungguwing beji, papayon kalih pangaci aci kaemponin antuk Krama Desa
- d. Yan wenten karecehan wicara sajeroning sekaa, pangempon pura utawi padayanan. Sekaa subak, miwah sekaa siosan wenang kategasang ke Desa, Prajuru Desa mawosin, nyahsahang nepasin wicarane, mangda mewali kajati mula
- e. Yan wenten sinalih tunggil kahyangan neng pangaci aci kantos dasawarsa, yogya Prajuru – Desa mawosin, maritetes, ngutsahayang mangde prasida mewali kadi jati mula. Nanging - prade tan kasidan, mejalaran antuk pamutus paruman desa, prasida desa ngewangunang – pangupacara mralina pura punika, mangda tan karanjingin, kaumahin antuk Kibhuta Kubanda.

2. Sukertan Pura Utawi Kahyangan:

A. Busana ngranjng ka Pura wenang nganutin dresta makadi :

- a. Ritatkala ngaturang ayah mangda mawastra lan maslempot

b. Ritakala ngaturang sembah manda mabusana jangkep

c. Siosan ring ajeng nenten kalugra, sajawaning sampun pituduh Prajuru Desa Adat.

B. Parilaksana tan kawenangan ring Pura luwire:

a. Msuwara sane kasinanggeh Wak Purusya, Wak Capala

b. Makoratan/mabacin, mawarih, masanggama

c. Masumpah utawi macoran sajawaning pituduh Prajuru Desa Adat

d. Ngiyas raga sajawaning Pandita miwah pinandita lan penari

e. Munggh tedun ring pelinggih sajawaning pituduh Prajuru Desa Adat

f. Mayuda kantos kapademan ring Pura

g. Memaling/memandung

h. Ngamademang wewalungan ring sengekering Pura sajabaning ngusaba

i. Ngrugada/Ngrudeg ring pura

j. Nenten dados nyusuin rare.

C. Sang mamurug kadi kecaping ring ajeng, keni pamidanda manut perarem.

D. Sang sapisire ugi rikalaning makemit ring pura kahyangan, yan merem tan kalugra, baur lan nang istrisajaba anak kapineh kantun alit durung remaja putra. Yan wenten mamurug yoga katiwakin danda pamarisuda kahyangan.

E. Yan wente anak utawi sapisire ugi katadunan utawi kapngluh ring sajeroning pura Kahyangan Sawewengkon Desa Aadat Asak, makta bawos minangkenang pangandikan Ida Ratu Sasuhunan utawi Bhatara, gelis tunasang tirta laluputan mangda gelis udep. Prade sampun kasiratin – tirta kantun ipun ngatemel patut pintonin. Indik mintonin ambalang toya apane, celebang li-man nyane makekalih, yan mabukti tan belus, nyandang gega pangandikan bhatara. Yan prade belus tan nyandang gega, gelisang gingsirang, genahang mangde doh saking Pura irika.

F. Sedahan ngengengan miwah sapanunggilan ipun tan kalugra maseha ring Pura Kahyangan, Sajabaning kabuatang pisan ring Krama Desa. Yan mamurug wenang katiwakin danda pamari Suda kahyangan, lan pamidanda artha manut perarem

G. Tatingkahe sane tan patut luwire:

a. Mundut utawi nyunggi ring bahu kiwa

b. Nyungklit Kriss ring kiwa, yan mamurug keni danda pamrayascita sakabuatan.

3. Indik Pangaci Aci, Pangodal wiadin Ngusaba ring soang soang Kahyangan Luwire:

a. Ring Pura Puseh; Purnamaning sasih kapat, kemargiang aci sambah. manut kawentenan;-

Soma Ribek, Buda Kliwon Sinta Yosan Pagerwes, Wrespati Wage Sungsang Yosan Sugimanek (sugian Jawa), Anggara Wage Dungulan Penampahan Galungan.

b. Ring Pura Muter: Rikalaning sasih Kasa pinanggal ping roras, nuju beteng, kewastanin usaba Sumbu Pamanguna Kaja.

c. Ring Pura Desa: Purnamaning Sasish Kasa Nuju Beteng Ngusaba Sumbu Pamangunan Kelod Purnamaning Sasish Kapat nuur Ida Bhatara Tirta ring Pura Bangkak, ring Pinanggal nuju Beteng Sasih kelima kawentenang Sanghyang, Ring Purnama Sasih kelima Ida Bhatara Lungka Pura Bukit Kangin, Purnamaning Sasish kenem Piodalan Ida Bhatara Dewa Ayu Tengana, Purnamaning Ke Dasa Ngusaba Kedasa sanunggil kalih warsa apisan lan Buda ge Kelawu – Piodalan Ida Bhatara Rambut Sedana.

d. Ring Pura Dalem : Tilem Sasish KeSanga nuju Kajeng Ngusaba Dalem Ageng, ngaturang Pacaruan Banteng Muwani Mabayang Bayang.

e. Ring Pura Dalem Alit : Rikalaning tilem Sasish kedasa nuju kajen Ngusaba Dalem Alit, nganggen Pacaruan Godel Luh sane durung matelusuk manggen Byang Bayang kewastanin Usaba Mapag.

f. Ring Pura Patokan Truan : Rikalaning pinanggal ping lima nuju beteng sasih Kawulu kewastanin Usaba Kawulu nganggen Pacarua Banteng Ageng Mabayang Bayang . Runutan Ngusaba Kawulu : sadurung ngusaba kawulu kawentenang Pacaruan Panca Sata magenah ring Catus Pata Beten Bingine, kemargiang ring Kajeng nemu Wage sasih Kepitu, pinanggal ping kalih nuju beteng kewastanin Matukeh utawi nglawar biyu, Tigang rahina sadurung Ngusaba Kawulu. Ring Ngusaba Kawulu Krama Desa Nyoman ngamedalang paturunan. Kajeng Pahing Sasih

Kepitu Upacara Nyaga Nyaga, Kajeng Kliwon Sasih Kepitu ngewangun Sanggah ring tanggun – Rurung soang soang. Yan Katemu rahina Kajeng Kliwon Ngewangun sanggah lan ngebah s – Sanggah ring rahina Muwu muwu .Sanggahe bangun lantur bah ngraris upacara kemargian Ring Pura Ulun Setra utawi Pamuhunan.

g. Pangaci ring Pura inucapa sampun manut kecaping sastra agama, saha kelaksanayang Nista, Madya lan Utama manut kawentenan lan pamutus perarem Desa Adat.

h. Aci Panyabran Makadi : Purnama, Tilem lan Kajeng Kliwon.

i. Rarahinan Jagat Luwire : Saraswati, Pagerwesi, Siwa Ratri, Galungan Kuningan lan Nyepi miwah sane siosan.

Pawos 26

Pangempon Soang soang Pura Manut Sakadi Drsta:

1. Pangempon Pura Patokan Olih Truna Desa Adat
2. Pangempon Pura Patokan Banjar Olih Banjar Adat Soang soang
3. Pangempon Pura Kahyangan Desa, sane wenten ring Desa Adat Asak, kaempon olih Kram – Desa Adat Asak.

Pawos 27

1. Ring Pura Kahyangan Desa Ke Adegang Pemangku Desa Adat luwire : Pemangku Puseh, - Pemangku Desa lan Pemangku Dalem.
2. Ring Kahyangan Desa Adat Ke Adegang Taler Sedahan Desa
3. Sajawaning Kahyangan Desa ke Adegang Pemangku Soang soang
4. Pemangku Desa, Pamangku Puseh lan Pemangku Dalem kalugra nganteb banten piodalan – Minekadi sane siosan, ring Pura pura sawewengkon Desa Adat Asak.
5. Sedahan Desa Wenang muput Pecaruan ring Pura Desa muwah sane siosan ring Desa Adat-Asak.

4.Indik Pemangku Lan Sedahan Desa :

A.Pidabdab Ngadegang Pemangku Luwire :

- 1.Saserodan,turunan utawi ngewaris
- 2.Nyanjan utawi Masemuran,soang soangg mapiteges mapinunas ring ajeng penataran=wiadin Pura Desa menawi ring Ssedahan Sonteng lan sapanunggilnya
- 3.Kacatri,kapilih ,katunjuk olih Krama Desa Adat.

B.Tan Wenang Ke Adegang Pemangku lan Sedahan Desa:

- 1.Sane kahanan,Cedangga
- 2.Sane katiben sungkan ila utawi sakit gede,buduhwiadin sane sungkan tan sida waras
- 3.Sane mabukti naen melaksana corah.

C.Prabeya Pemangku lan Sedahan Desa :

- 1.Sang Kasudi jaga keadegang Pemangku lan Sedahan Desa,patut mawinten ring genahe dados jan bangul .Mungguwing prabeya kesandangin antuk Desa utawi pangempon soang soang.
- 2.Yan Pemangku utawi Sedahan Desa katiban pati yogya tiniwakin,patut polih prabeya atiwa tiwa saking Desa utawi pangempon pura sane kahemongin.Agung alit patulunge manut – ring bebawos perarem.Yan sampun tiniwakin patut karyanang Pangelad utawi Pamegat. Nika yaning Pemangkune lan Sedahan Desa kantun Rajeg ngamong Swadarmaning Pemangkiu kantos antaka.

D.Pemangku lan Sedahan Desa Kagentos Majalaran antuk:

- 1.Lina Utawi Seda
- 2.Pinunas Ngraga
- 3.Kausanang sangkaning mamurug sesananing Pemangku lan Sedahan Desa.Prade Pemangku utawi Sedahan Desa kausanang sankaning mamurug sesana,keni danda manut perarem

E. Swadarmaning Pemangku lan Sedahan Desa:

1. Ngantebang upacara piodalan ring Kahyanag Desa utawi ring soang soang pahumahan – Krama
2. Tan wenang salah sulub, yan mamurug wenang Pemangku inucap nyapuhin raga
3. Prade silih sinunggil Pemangku kapialang utawi cuntaka, kengin nuur Pemangku siosan – utawi nuur Sang Sulinggih
4. Samalih yan sampun Pemangku ngayah tigang rahine ring Pura, kancit wenten keluarganya lina, Pemangku inucap tan keneng cuntaka, sakewanten Pemangku nenten dados man tuk salami piodalan.

F. Patias utawi piolah olih Pemangku lan Sedahan Desa :

1. Upon palaba crik miwah tegal manut perarem
2. Luput sahananing pekaryan lan rerampen utawi reramon
3. Satunggil Usaba Kedasa Pemangku lan Sedahan Desa Polih busana aparadegan.

5. Indik Cuntaka Miwah Sosot:

A. Sane Kasinanggeh Cuntaka Sekadi Ring Sor :

1. Sang sapasire kacuntakan saklewiring cuntaka yan durung mabersih tan kalugra ngranjing Ka Pura Kahyanagan
2. Sang Patita utawi Panak Babinjatsadurung maperas utawi maupakara
3. Makta sehananing sane kasinanggeh ngletehin
4. Mabusana sane nenten manut kadi tata caraning ngranjing ka Pura sajawaning pituduh – Prajuru Desa
5. Makta wewalungan suku pat, sajawaning ri kala mapepada utawi Ngusaba
6. Medagang ayam ring wewidangan Pura
7. Anak alit sadurung mayusa tigang sasih

8. Sedurung polih wa-wakan (pituduh) Prajuru Desa Adat

9. Krama Desa sane nyarengin ke setra lan ngarap sawe, ngamel saha ngembat sa eteh eteh
Sawe

10. Ngamel saha ngarembat sa eteh eteh pula palaning sawe cuntaka arahina saha punah cuntakane macihna malukat.

B. Sengker Cuntaka luwire:

1. Cuntaka kalayu sekaran, cuntaka kantos masapuh manut Dresta

2. Cuntaka Ngraja Sewala salami ngraja sewala

3. Rama Rna cuntaka sangkaning madruwe oka :

a. sane lanang cuntakane salami roras dina saking mbas okane kantos malukat

b. Sane Istri pinaka Rna cuntakane petang dasa kalih dina saking mbas okane kantos malukat.

4. Cuntaka Kruron pateh cuntakane kadi anak ngembasang oka

5. Cuntaka pawiwahan ngantos sesampun wusan matirta pabiakawonan

6. Cuntaka Gamia gamana ngantos sesampune kapalasang utawi masapihan tur sampun –
Kawenang pamrayascitta raga, miwah pamrascitta Desa Adat utawi Kahyangan

7. Cuntaka salah timpal kapuputang manut Dresta

8. Cuntaka anak istri mobot sadurung kawentenang upakara pabiakawonan, cuntakanya ngantos upakara pabiakawonan

9. Cuntaka Mamitra ngalang cuntakanya ngantos kawentenang upakara pabiakawonan

10. Ngembasang putra/oka sadurung kewentenang upakara pawidiwidana cuntakanya kantos
Wentwn mameras sang putra/oka tur sampun kawentenang upacara manut Dresta

11. Yan wenten anak istri seda kabebeng minekadi seda ngadut manik, sang meduwe wirange
Cuntaka petang dasa dua rahine (42 dina)

12. Sang nyambut karya atiwa tiwa cuntakanya ngawit saking ngadegang kantos puput yadnya
tur neluni (nigang dinain).

C.Sosot:

1. Yan wenten sinalih tunggil pacang nawur Sosot wiyadin punagi, salewiring punagi gumanti Sane patut nganggen pamegat sot, tan dados nawur sosot yan tan kalaning dina piodalan-Bhatara. Ngadsa dinayang aci aci sang pacang nawur punagi patut sampun mesadok ring – Pemangku Pura, yanring kahyangan desa penawure, mesadok ring Prajuru Desa. Penawuran Punagi punika wau kelaksanayang yan sampun puput pangodale.
2. Yan wenten sinaih tunggil nawur sesangi, pacang ngaturang piodal, ugi mangda ring dina-pagentosan piodalane. Sang nawur punagi wenang nunas kanti patullung karya ring Krama Desa utawi pemaksan Pura. Sang nawur sesangi nyukserahang daging cumek saprabiya-ning pangodal ring pemaksan Pura
3. Yan wenten sinalih tunggil nawur sesangi, maturan suwaran tamburan saluwiring tatabuhan Sasolahan, minakadi saluwiripun mungguhing prabiya punika sami kangganing antuk sang-Masesangi.

PALET 2

RSI YADNYA

Pawos 28

1. Sang pacang madeg pandita utawi pinandita minakadi Pemangku saliwire jagi ngenterang-Yadnya patut mesadok ring Prajuru Desa.
2. Prajuru Desa patut ngicenin tur wenang ngandegang prade wenten kacihne lempas ring – kecaping sastra miwah dresta, tur sareng nyaksiang upacara saha nyiarang ring paruman – Desa.
3. tegep rauhing wates kawenangang pangenter yadnya.
4. Upacara Mesih utawi mabersih kawentenang ring Desa Adat Asak sane kaprebeyain saking Desa Adat, sakewanten pemargine manut Dresta.

Pawos 29

1. Jero Mangku patut ngutamayang nganteb upacara ring Kahyangan Desa, sesampune usan – wau dados ngantebang yadnya ring genah siosan.
2. Kalaning Dewasa Ayu wenang Desane Metirta Yatra, wenang Desane ngaturang punia miwah Rsi Bojana ring Ida Sang Sulinggih, taler kalaning karya utama ring desa, sakeluwiring karya – sane kaputus antuk Ida Sang Sulinggih patut ngaturang punia, asapunika taler ring sang sane mapitulung patut maweweh dana.

PALET 3

PITRA YADNYA

Pawos 30

1. Ngupakara sawa ugi manut sastra Agama Hindu, wenten makudang kudang soroh luwire:
 - a. Mapendem ring Pertiwi
 - b. Makingsan ring Gni
 - c. Atiwa tiwa utawi Ngaben
 - d. Yan rare durung ketus untu, wus kepus udel, antaka, wenang nganggen pangentas bangbang masedana klungah nyuh gading ngaran Nglungah
 - e. Yan rare durung kepus udel antaka, Pamali Ngaran, pendem juga, tan hana pangupakaranya, kewala agem paican Ida Sulinggih.
2. Atiwa tiwa pacang kelaksanayang petang warsa apisan, yan mamurug keni danda artha mape ngarga 1000kg beras lan ngeruwin desa.
3. Pangingune ring Krama Banjar wantah apisan ring puncak karya manut kawentenan.
4. Yaning wenten Krama mendem sawa kalaning dina larangan ke Wara, nanging ugi mesawen durung magegumuk laku kingsan ngaran, sesampune polih lugraha ring Prajuru Desa. Pemarkine ka setra mangda nyilib tur engseb surya tan polih panyangran banjar miwah tan dados nyuwarayang kulkul.
5. Yaning wenten kapademan rikalaning pahaci ring Desa Adat Asak, patut makingsan ring setra

- nenten kedadosang ngeseng sawa yadiyastun soroh mageseng lan pemargine ka setra – mangde engseb surya nenten polih panyangran banjar lan nenten dados nyuarayang kulkul.
6. Nenten dados medem utawi ngeseng sawa siyosan ring setra Desa Adat Asak, yan mamurug keni danda artha mapengarga 100kg beras.
 7. Nenten dados mendem utawi ngeseng sawa Krama sane nenten ma Agama Hindu ring – Setra Desa Adat Asak.
 8. Nenten kedadosang mendem utawi ngeseng lan ngabenang sawa Krama sakeng dura Desa Ring Desa Adat Asak, sejabaning sampun polih lugraha saking Prajuru Desa.
 9. Yaning wenten Krama Desa usan mendem, ngeseng sawa utawi upacara pengabenan, sahusan upacara mangden mereresik utawi mabersih ring setra masenger pitung dina, yan mamurug keni danda artha mapengarga 50kg beras.
 10. Sang sapasire silih sinunggil Krama sane kapanggih mongkar kuburan tan mesadok ring – sane nuwenang sawa keni panyangaskara manut perarem.
 11. Sang sapasire ugi krama sane mendem utawi ngeseng sawa, patut kekaryanang upakara – Pakingsan sanistanya, pejatian ring Prajapati asiki, pangulun setra asiki, ring genahe mendem utawi ngeseng asiki.
 12. Sang sapasire ugi krama Desa Adat Asak tan kalugra makta sawa kadesaadat yan sampun – Sawa inucap sampun keni pangupakara sawa, yan mamurug keni danda panyangaskara manut perarem.
 13. Tan weang ngahgah, ngulung ntegesipun ring sajroning setra tunggal, tan dados mersihinsawa nuju dina pangutangan, yan ring setra punika wenten ngelaksanayang pengabenan – yan mamurug keni danda manut perarem saha mrayascitta setra.
 14. Tan wenang ngutang ngirim tegesipun ring sajroning setra tunggal, yan wenten ngirim – tan dados sane siosan mendem sawa minakadi atiwa tiwa ring dina punika. Yan mamurug keni danda manut perarem lan mrayascitta setra.
 15. Yan wenten sawa tan kepariangken ring wewidangan Desa Adat Asak, ngaran Badagan Desa Wenang pendem ring setra pangilang ilang .

16. Yan wenten mendem sawa utawi makingsan ring Gni rangkungan ring asiki sajeroning setra tunggal yogya pemargine sinarengan, katuntun antuk Prajuru Desa.
17. Yan wenten sinalih tunggil sawa genahe seda sejawaning ring karang pahumahan luwire: (ring tegal, pura, pasar, banjar, sekolah lan genah siosan tan karang pahumahan) yogya sang Madruwe wirange mrayascitta marisudda genahe punika, yan sawa tan kepariangken, - Genah punika patut kaprayascitta kaparisudda antuk sang madruwe emponan.
18. Tan wenanag nyekeh sawa yan tan macamana utawi matumpang salu lintangan ring pitung rahina, ngawit dinane seda. Yan mamurug keni danda manut perarem.
19. Tan kalugra nginepang lan ngewandeang bangbang ring setra. Yan mamurug keni danda manut perarem.
20. Pemargin atiwa tiwa manut sastra Agama.

Pawos 31

ATMA WEDANA

1. Upakara upacara Pitra Yadnya ri sampune ka Abenang, mungguh daun bingin utawi ngeroras. Sesampune wusan ngeroras raris kemargiang ngelinggihang Dewa Hyang ring Kamulan.
2. Sang sapasire ugi ri kalaning atma wedana luwire, ngeroras, patileman, baligia, tan wenang – ngewangunang payadnyan/petak ring Kahyangan Desa miwah ring Kahyangan siosan.
3. Sang sapasire ugi wus nangun karya atama wedana yogya karang payadnyan utawi petak – punika kapralina sakarep ipun petang dasa kalih dina sakeng ngawit karyane.

PALET 4

MANUSA YADNYA

Pawos 32

1. Manusa yadnya inggih punika upakara upacara darmaning manusa ngawit saking patemon kama bang kama petak sajeroning garbha ngantos pawiwahan lan pawintenan manut sastra Agama.

2. Sang sapisire ugi krama desa ngewangunang salwiring upacara manusa yadnya tan wenang magenah ring wewidangan palemahan Kahyangan, sajawaning pawintenan pemangku miwah prajuru desa. Yan wenten mamurug keni danda mrayascitta miwah marisudda pura punika.

PALET 5

BHUTA YADNYA

Pawos 33

1. Bhuta Yadnya inggih punika upakara upacara biya kala ring pertiwi lan kahyangan, sarw prani-Saha upacara upacara ring bebutan.
2. Upacara pabiyakala ring pertiwi, kahyangan lan babutan kewasttanin Mecaru.
3. Upacara inucap ring ajeng nista, madya lan utama manut wiguna kadi ring sor :
 - a. Saiban
 - b. Segehan
 - c. Eka Sata
 - d. Panca Sata
 - e. Rsi Gana
 - f. Tawur Agung
 - g. Panca Kelud lan
 - h. Balik Sumpah.
4. Sajeroning Desa Adat Asak, pacarruan manut ungguhan Sor Singgih Luwire :
 - a. Pecarruan Desa Sada Kala sanunggil :
 1. Ngemasa masa sanunggil kajeng nemu wage sasih kapitu kemargiang pecaruan Panca – Sata ring Catus Pata Desa.
 2. Ngemasa masa nuju kajeng tilem sasih kapitu kamargiang caru bayang bayang asu bang Bungkem magenah ring Pura Pangulun Setra.
 3. Ngemasa masa rikalaning pinanggal ping lima nuju beteng sasih kawulu pacruan ngang-gen bang bayang Banteng Ageng magenah ring Pura Patokan Truna Adat.

4. Ngemasa masa nuju kajeng tilem sasih kesanga mecaru bayang bayang banteng jagiran magenah ring Pura Dalem Agung.
5. Ngemasa masa rikalaning kajeng tilem sasih kadasa mecaru bayang bayang godel luh sane durung matlusuk magenah ring Pura Dalem Alit.
- b. Pacaruan Desa Pamegat Kala ri kala jagate kabrebehan, kageringan, kadurmanggalan, kapan-cabaya miwah sane siosan manut sakabuatan.
5. Pacaruan rikalaning tilem kesanga ring karang paumahan soang soang manut sastra dresta – kelanturang antuk brata panyepian.
6. Pacaruan ring Pura Kahyanngan, Pemrajan, Paibon sakluwire manut dresta pura soang soang minakadi awig awig gegaduhan pura inucap.

Pawos 34

1. Brata Panyepian sane kemargiang Desa Adat Asak luwire:

- a. Amati Gni : Tan dados me api api
- b. Amati Karya : Tan Dados me karya
- c. Amatai Lalangan : Tan dados masuware gora, majejuden, lan sapnungilanya
- d. Amati Lalungan : Tan dados luas utawi melalungan.

Pabratan panyepian inucap kemargiang saking semeng kantos semeng benjangne.

2. Sang mamurug kadi kecaping ring ajeng sajawaning sane mapuankid/petugas keni danda-
artha mapengarga 10kg beras.
3. Ring rahina Ngrupuk, Nyepi lan Ngembak Gni nenten kedadosang ngewangun yadnya, sajawa-
ning sane mapuankid saha polih palugrahan saking Prajuru Desa. yan mamurug keni danda-
arta mapengarga 100kg beras.

SARGAH V
SUKARTA TATA PALEMAHAN

PALET 1

Pawos 35

1. Krama Desa sane ngemong karang ayahan patut ngewatesin karang inucap antuk pagehan turus utawi tembok, mangda pekantenane asri.
2. Wates sisi kaler lan sisi kangin, patut kekaryanin antuk sang ngemong karang ayahan inucap sane mewasta gagaleng keluan, sajawaning tanah pecatu, tegal, bangket, utawi padruwen – Ngraga, sane kapiara watese sisi kelod miwah kauh, reh punika mewasta gagaleng kateben.
3. Yan wenten karang pahamahan kabebeng, tan madruwe margi, rurung miwah punden, - sang madruwe patut ngatengahang bebawose ke Desa, prajuru desa yogya negdeg ngutsaha yang mangda polih margi, melarapan sami pada suka, sukat ngantos nglintangan pepaga, yan patut katumbas mangda manut pangharga tanah sane kemanggehang antuk sang AmawaRat sami katawur antuk sang sane mamuatang.
4. Yan Desa pacang ngelinggahang margi, rurung minakadi mekarya margi, rurung desa sakeng – sampun ingkup pasuwaran desa, yan nganggen tegal, carik miwah sane siosan wenang tan – nawur tanah punika, nanging yan medaging tetanduran, papaon, wewangunan sakeluwire, - desa patut ngicen prabiya, agung alit manut kadi parembug desa kala punika.
5. Sahanung Karang Pahumahan ugi mangden masengker. Pidabdab nyengker magaleng kadu- lu, panyengker sane sisi kangin lan kaler patut kekaryanin sang sane magenah ring karang – punika, sajaba karang ngele, wiadin nglingkehin rurung utawi palemahan suwung.
6. Sang sapisire ugi tedah ring Agama Hindu, tan kapatutang ngenahin karang desa.
7. Krama desa sane nguwig karang suwung, nimbalin, numbas, wiadin ngewarisin karang desa Ring wewidangan Desa Adat Asak, ugi manfa tedun ngayahan karang inucap ring desa.
8. Yan wenten karang desa nenten kagenahin, lintangan ring nem sasih, mangda samounang kan

tos kahumahin I Kala Kubanda, Dite, Tonya, ngantos ngawinang pisagane jekeh, hajrih, takut, -
karang suung inucap patut kawaliang ke desa, yan tan kawaliang ke desa, Prajuru enang ngam-
bil karang suung inucap.

9. Sang sapisire ugi ngenahin karang tegehan, patut naku tegehe asukat natah dangsah sane te-
benan wenang nyusunin tembok.
10. Telajakan karang patut kapiara ring sang sane ngenahin karang soang soang mangde kanten
bersih tur asri.
11. Yan wenten sinalih tunggil nyadua nyleksek wiadin ngaleklek babeledan saklewiring baba-
ledan wiadin wewatesan yogya katiwakin danda manut wrat ringan ka iwanganne, saha -
ngantukang sane kateleksek, wiadin kaleklek kalih mrayascitta sakabuatan sane nyandang-
katiben panyangaskara.
12. Yan wenten sinalih tunggil ngaletihin, ngarecokin, ngarobeda, ngararaban palemahan liwa-
ring pahamahan padruwen nyane, luwire ngutang luhu, bangkahan miwah sakeluwiripun,
nyorogang bebanyon, yogya katiwakin danda manut perarem tur mahayu sane kaletehan-
karucakan, karobedin, kararaban inucap ring ajeng.
13. Yan wenten krama ngenahin palemahan sajeroning wawengkon desa adat asak, tan tinut ma-
krama desa nganutin awig awig lan pasuwaran desa, tan kalugra nganggen saluwiring padru-
wen desa tan kalugra nangun Panca Yadnya sajeroning Desa Adat Asak. Yan tekoning kappa-
tian dados subang utawi pendem ring setra pangilang ilang, tan polih pasanggran desa lan-
banjar.
14. Yan wenten krama tan ma Agama Hindu ngenahin palemahan sajeroning Desa Adat Asak, -
Patut nganutin pasuwaran desa adat Asak.
15. Yan pacang nglintangang toya bebanyon sakeng pekaranganne nglintang palemahan saosan
urung urung utawi pivane patut metanem, dalem tetaneme sa sor atengah meter.
16. Sang sapisire ugi pacang migunayanyang palemahan tegal, carik, pekarangan sajaba pacang-
genah metanduran, genah pahamahan yogya sangkaning palugrahan prajuru desa adat asak,

lan plugrahan guru wisesa. Yen mamurug sesampun polih kasambatsara antuk desa, sang mamurug keni sangsi kasepekang ring desa.

17. Sapasire ugi krama desa nenten kedadosang ngenahang barnag barang sane ngalikadin, nyemuh sahananing jajemuhan ring palemahan utawi ring Jaba Pura, ring trotoar. Yen mamurug keni danda artha mapangarga 100kg beras.

18. Sang sapasire ugi krama desa adat asak, yen pacang ngadol, ngantahang, maselangang, majegang, makedihang palemahan sajeroning desa adat asak, ugi mangda polih palugrahan prajuru desa adat asak. Yen wenten mamurug keni danda artha manut perarem lan indike punika kawicarayang antuk desa ring sajeroning Paruman Desa.

PALET 2

KEKAYONAN

Pawos 36

1. Ngawit nandur kakyonan tanem tuwuh patut adepe agung ngajeroang sakeng wates, prade - jantos ngliwat wates patut kasipat gantungin.
2. Yaning wenten kakayonan ngungkulin, samalihe kantos mayanin kapisaga, patut kawara antuk paiguman ping ajeng, mangda sang nuwenang wit ngarebah utawi notor.
3. Prade sampun kewara taler nenten wenten usaha sang nruwenang wit,, sang rumasa katetehan, kajrihan wenang mesadok ring prajuru Desa tur risampun kaparitas kalugra ngicalang wit inucap.
4. Sang keni pamidanda penyangaskara saha prabiya manut perarem arep ring wewangunan - sang karubuhin luwire:
 - a. Sang nruwenang wit sinanggeh mayahin, prade pungkut ngrubuhin wewangunan krama sios
 - b. Sang notor punggul utawi ngrebah taru tur ngrubuhin wewangunan krama sios
5. Krama Desa patut ngemanggehang kawerdian tanem tuwuh sane ngawinang desane asri turlestari.
6. Tan kalugra nekteb, ngrebah, wit witwn saluwiripun ring pe alasan, pa tegalan, abian, tangkid -

miwah genahe sawwosan,sane ka keker antuk desa.yan mamurug katiwakan danda manut lokika,manut pasuwara,tur taru sane ka rebah ngranjing ka desa.

7.Saluwiring wit witwn sane wenten ring tanah laba pura,sane sampun kacirinin wiadin kesawe

nin antuk desa pacang manggen mapuwangun ring desa,pradena nika karebah antuk sinalih tunggil krama desa,yogya katiwakang danda manut lokika utawi ngetang pangarga tur taru – sane karebah ngranjing ka desa.

8.yan wenten wit witwn ngungkulin palemahan anak sios,sane ngawianang tiyeb,tampiyas nga robedin,asing kaungkulin wenang ngatengahang ka desa,desa maritetes saha mituduhang - sang madruwe mangde ngrancat,nebtew wiadin ngrebah.Yen ngantos ngantos pang tiga pituh duh desana tan karunguang,wenang katiwakin danda sang anikel tuduh,gung artha manut pasuwara.kekayon utawi wit punika prasida karebah antuk picundangan desa.

9.Tanem tuwuh sajeroning karang pahamahan,tan kalugra teguh nyane lintangan ring jan palit Solas,bungkil nyane adepa agung saking panyengkere ngajeroang.yan mamurug wenten raris ngatengahang ka desa,yogya mangda sang adruwe kakayon punika mangda ngarebah mawatest gang rahina sakeng pamuput bebawose.

10.Tanem tuwuh sajeroning karang pahamahan,ugi mapiara mangda tan ngaletihin,ngarobedin Ma mayen karang sawosan sakeng akah kantos daun nyane. Yan mamurug wenten raris ngatengahang ka desa ,prajuru desa yogya maritetes saha nepasin manut panglokika kalih pasuwaran desa.

11.Yan wenten wit taru mentik kantos ageng ring bebaledan wates,saluwiring bebaledan muwang watees ,wenten ngatengahang ka desa ,patut taru punika karebah ,raris kakepah tiga, apah tigaan ngranjing ka desa,sang maduwe babledan soang soang apah tigaaan taler.

2.Yan wenten nundungin tanem tuwuh ,kakayon,sane ma mayen,wenang kebawosang ring – sang sane maduwe.yan akas sang sane maduwe yogya katengahang ka desa.Prajuru Desa-yogya negdeg tanem tuwuh punika.Yen manut panglokika parjuru desa yogya tundungin,-

taler akas sang madruwe,patut spat gantungin.yen jati kadi panyuwatahe,yogya sajering
tigang rahina karebah picundangan,sang madruwe katiwaking danda gung arta manut pa-
suwara,dosane anikel tuduh.Yan tan yukti kadi panyuwatahe,sang ngatengahang katiwakin
danda ,gung arta manut manut pasuwaran,dosane angadakakennora.tanem tuwuh punika
nenten karebah.

13.Tan kalugra nandur padang gajah,pandan,pijer,turus,sauwiring tanem tuwuh wiadin kaka-
yonan sane dados ageng ring margi agung,ring margi subak,nyleksek bebaledan ring wates
utawi pundukan.Yan mamurug yogya katiwakin danda gung arta manut pasuwara tur nga-
mademang tetanduran punika.

14.Sang sapisire nyakap tegal utawi tanah saosan ,tan kalugra ngarebah tanem tuwuh sane –
dados anggen lakar weewangunan,yen tan polih lugraha sakeng sang madruwe.

PALET 3

WAWANGUNAN

Pawos 37

- 1.Sang sapisire kram sawewengkon desa adat asak yan pacang ngawangun panyengker karang
pahumahan,patut masueksa ring penyanding nyane.yan tan kenten yogya degdegang ring pra-
juru desa,Prajuru jagi negdeg sadu ajeng sang mawicara.
- 2.Wawangunan ring palemahan pecak carik,tegal,palemahan suwung,sane mesanggah mepa –
won,palemahan punika prasida kabawos karang pahumahan,duwaning sampun katwakan sa
upakaraning karang.Awanan patut maduwe rurung betel ka margi agung,sukat dados pacang
nglintangang papaga duwaning tan kapatut nglintangang sawa ring tegal.Yen wenten mamu-
rug yogya prajuru desa ngamargiang tatepasan mangda sang mamurug merayascitta palema-
han inucap sane kalintangin.
- 3.Yan tan mesanggah pangulunin karang kabawos akakubon.Tan yogya genah ngraksa sawa.Yen
wenten mamurug yogya katiwakin pamidanda mangda merayascitta palemahan punika.
- 4.Yan wenten sinalih tunggil sang sapisire ugi pacang ngewangun genah ngelaksanayang upaca-

ra Agama sekadi Pura miwah sane siosan , mangda wenten lekita palugrahan prajuru desa, kaji-
lih palugrahan guru wisesa .Yen wenten mamurug punika yogya wangdeyang.

5.Wawangunan jroning karang pahumahan ,ugi nganutin Tri Mandala :

- a.Utama Mandala : sanggar panguluning karang
- b.Madya Mandala : Pagenahan mapaumahan
- c.Nista Mandala : Jabayan utawi lebu.

6.Tan wenang ngungkulang utawi ngruntuhang toya capcapan kajroning karang saosan.

Yen wenten mamurug, wenten ngatengahang ka desa yogya prajuru desa negdeg, saha nyi-
pat gantungin. Yen jati lintang, sajroning selae dina sakeng puput bebawose mangda sampun
kapastika.

7.Tan wenang tembok umah wiyadin tembok panyenger, tani druwe. Wenang ye kasambat sara
antuk sang madruwe. Yen akas tur mamurug yogya katengahang ka desa kabawosin antu pra-
juru desa.

8.Sang sapisire pacang mapwangun nepi ring margi ageng, nepi ing urung desa, utawi ring pale-
mahan siosan, ugi mangda wenten lekita palugrahan saking prajuru desa utawi sang amawa -
rat. Yen tan polih lekita palugrahan, patgatkala wewangunan punika dados katundungan tan -
ngetang prabyan tatundungan.

9.Sang sapisire ugi ngawengku karang pahumahan yogya hurati miara ka asrian lebu pekarang
annya, rurung paentasan pinih sor asukat karangnya nglanjur.

10.Sang sapisire ugi krama desa yen ngewangun pahumahan utawi karang ring tanah drwen de-
sa sekadi tanah laba pura, yogya polih palugrahan saking prajuru desa utawi pamutus pera -
rem desa adat Asak.

PALET 4

WAWALUNGAN

Pawos 38

L.Sane kinucap Wawalungan, inggih punika sakancan buron suku pat nyadia kapiara, sakadi :

(bawi,banteng,kambing,kebo,misa,jaran,asu,miwah sapanunggilan ipun,taler watek me-
kampid ,utawi suku kalih sekadi : ayam,itik,angsa,dolong,miwah sapanunggilan ipun).

2.Sang sapisire ugi krama desa sane miara wawalungan suku pat,tan kapatutang kalumbar. –
sane patut katlusuk amngda katlusuk,taler buron sane wenang katalinin baong,mekandang,
maglogor,mangda tan ngarucakin,ngaletihin palemahan tani druwe,tan mamyen krama.
Yen asu mangde mabelat,luwire makalong bawong,makacihna wentwn sane miara tur –
makacihna sampun mavaksin,tur asu punika mangden ka tegul. Yan wenten sinalih tunggil
krama kacegut antuk asu,sang sane maduwe asu punika wenang kakenin prabiya kantos –
seger ka jati mula.

3.Sang sapisira ugi krama desa sane miara wawalungan suku kalih utawi makampid,yatnain
hugi manda tan ngrucakin,ngaletihin palemahan pahamahan,tetanduran druwen anak sios.

4.Tan wenang me angon angonan,negulang,hingon hingonan,ubuh ubuhan ring palemahan tan
druwe,yan mamurug wawalungan punika sandang taban saha katengahang ring prajuru desa.

5.Yan wenyen maubuhan ring tengahin karang paumahan minekadi: bawi,ayam,iti,asu lan se-
kancanya mangda kotorannya tan maambu kantos tan side antuk penyandinge ngadek,lan-
tan dados ngutang kotorannya ngaliwatin paumahan siosan,yan mamurug wenang katenga-
hang bebawose ring prajuru desa saha keni danda manut perarem.

6.Tan kedadosang ngrereh,ngejuk utawi medil paksi ring wawidangan Desa Adat Asak,sejaba-
pacang mangge daging yadnya .

7.Tan dados ngrereh ulam ring tukad,jlinjing miwah kolam nganggen tube(portas lan sane tiyo-
san).Yan mamurug keni danda manut perarem Prajuru.

8.Sakancan daddandan,dadosan sane munggah ring ajeng ,sami ngranjing ka Desa Adat Asak,-
agung alit ipun kaungghang sajroning pasuwaran Desa Adat Asak.

SARGAH VI
SUKERTA TATA PAWONGAN

PALET 1

PAWIWAHAN

Pawos 39

1. Pawiwahan inggih punika patemining purusa pradana melarapan panunggalan kayun suka cita kadulurin upesaksi sekala niskala.
2. Pemargin pawiwahan kaptutang tur katinutin antu krama desa tan singsal ring uger uger pane gara luwire :
 - a. Pepadikan
 - b. Merangkat utawi Ngerorod
 - c. Ngunggahin
 - d. Jajngkepan
3. Pidabdab sang sane mawiwaha patut :
 - a. Sampun manggeh daha truna
 - b. Sangkaning pada tresna
 - c. Masudi wadani prade pangambile sios Agama.

Pawos 40

Pawiwahan sane kapatutang ring desa yen sampun mawidi widana pawiwahan, sanistanya abyakawon tur malukat kesaksinin tri upa saksi, wawu pawiwahan punika kasinanggeh uput palikrama.

Pawiwahan punika patut kailakitayang ring desa miwah ring sang AmawaRat.

Pawos 41

Tata Cara Parabiyan Ring Desa Adat Asak

1. Sang sapasure ugi Krama Desa Adat Asak, yan karawuhan tamyu praya masinutan melarapan antuk ngarorod, mangda masadok, mihuningang ring prajuru desa, parjuru desa yogya marite tes, yan tan sangkaning patut rangkate, prajuru desa wenang ngunduhang mangda katur ring sang AmawaRat. Yen wenten krama desa mamurug, yogya sang mamurug keni danda gung – arta manut pamutus perarem.
2. Yan wenten sinalih tunggil saking dura desa pacang muputang rangkat miwah ngambil kawewengkon desa adat asak, sang madruwe wiring Luhe, yogya nunas upasaksi ring prajuru desa.
3. Yan wenten anak istri sakeng Desa Adat Asak merangkat kadura desa, ritakala mapuputan – nyongkol kajero, wirange istri patut ngaturang panebas suaran kulkul 25Kg beras, pahpahan nyane manut perarem.
4. Yaning wenten sinalih tunggil Krama Desa Adat Asak ngamet anak istri antuk mlegandang, mamedet, marikosa, miwah saluwiripun tan sangkaning sami pade tresna, tan yogya kapuput widi widana pawiwahanya sadurung wenten pamutus saking guru wisesa.
5. Yan wenten krama desa pacang ngewangun yafdnnya, mamuatang saksi pamangku desa, Keliian Desa Adat <mina kadi klian dinas, klian banjar sasor ipuntigang dinayang patut sampun Masadok wiadin matur huninga, saha ngaturang panguleman ring pemangku.
6. Yaning wenten anak llanang ring krama desa adat asak ngambil anak istri tan ma agama Hindu, pawidi widana pawiwahanya patut kalaksanayang sesampune anake luh Masudi Widani.

PALET 2

NYAPIHAN UTAWI BALAS MAKURNAN

Pawos 42

1. Pawiwahan prasida kahusanang melarapan antuk palas merabian sesampun polih palugraha saking prajuru desa utawi sampun katiwakan pamutus saking guru wisesa.
2. Yen wenten krama desa adat asak ngrangkatang sapihan tan kapatut sadurung mawaneng tiga-sasih utawi 105 dina sakeng dina palase. Yen mamurug sane ngrangkatang sapihan punika ke-

ni danda pakerang gung arta manut perarem.

3. Krama desa Adat Asak sane palas merabia, sesampun polih pamutus saking guru wisesa, patut masadok mihuningang ring klian banjar mnganda kadamyakang ring banjar taler ring desa sekarep ipun asasih saking palase.

4. Yan wenten anak istri sakeng wawengkon desa adat asaknyapihan, yan mewali mulih daha – yogya sang maduwe wirange matur supeksa ring prajuru desa saha mrayascitta marisudda – anake luh punika, yen tan kaparisudda antuk wiringnya patut marisudda raga mangda kasi – nanggeh nirmala.

PALET 3

BALU

Pawos 43

1. Palas merabian riantukan sinalih tunggil lina utawi seda mapiteges Balu, mekadi Balu Lanang utawi Balu Istri.

2. Yan wenten sinalih tunggil anak istri, balu raris merangkat, yogya rangkat punika kapuputang antuk wiring lakine riin. Yan Babaluan punika kantong pageh.

3. Prade Balu sane pageh nganutin swadarma raris katundung olih waris rabine, balu inucap patut matur supeksa ring prajuru, prajuru patut mamawosin ngicen tatimbangan yan tatimbang Prajuru tan katinutin, sinalih tunggil dados nglanturang wicara ring sang AmawaRat. Prade pamutus sang AmawaRat pateh kadi tatimbang prajuru desane, sang ngaturang wicara ring Sang AmawaRat keni danda manut pamutus perarem desa.

PALET 4

SENTANA

Pawos 44

Sentana wenten kekalih sane kinucap pratisentana miwah Sentana Paperasan.

Pratisentana inggih punika sane metu sakeng pawiwahan kapatut.

3. Krama desa dados meras sentana maupa saksi skala niskala sane kawastanin Sentana Paperasan.
4. Prade pawiwahan tan kapatut raris ngawetuang sentana magda kabawosin saha polih pamutus saking prajuru desa.

Pawos 45

1. Sang sapisire ugi krama desa adat Asak pacang ngedih sentana ,patut masadok ring Kelian – Desa Adat sanistanya asasih sadurung pamerasan.
2. Kelian Desa Adat miwah Kelian Banjar Adat nyobyahang ring krama desa miwah ring banjar, Sang sapisire ugi rumasa tan cumpu, masengker kalih wuku sadurung pamerrasan mangda- Masadok ring Kellian Desa Adat.
3. Kelian Desa Adat utawi Prajuru digellis mawosin saha ngicen pamutus manut pasuwaran desa.
4. Prade sasulur paperasan tan manut kecapin ajeng, prajuru desa wenang ngandegang saha ngicen pamutus mangda kapuputang ring babawosan sulur utawi wicara paperasan punika.

Pawos 46

1. Paperasan sane sampun kapatut ring Desa Adat Asak, yen sampun :
 - a. Sangkaning Radin
 - b. Kasaksiang antuk manggal utawu Prajuru Desa Adat Asak
 - c. Kasiarang ring Krama Desa
 - d. Polih lekita palugraha saking sang AmawaRat.
2. Sane patut kaperas anggen sentana sakadi ring sor :
 - a. Kautamayang sakeng waris pancar kapurusa
 - b. Polih persetujuan saking keluarga purusa
 - c. Yaning meras sentana saking luar Desa Adat Asak, semaliha sentana sane kaperas nenten mbas sakeng pakurnan sane mawiwit sakeng pawiwahan utawi pawidiwidanan sane kapatutang ,nenten kedadosang matrana adat yening lanang, nenten kedadosang ma deha ad

yaning istri.
3. Sang sapisire ugi krama desa adat Asak, makedihang utawi makundulang raga, yogya sangka-ning radin, maduluran antuk wicara widiwidana manut sastra Agama Hindu, kasaksinin antuk Prajuru Desa saha polih lekita pamikukuh saking guru Wisesa.

PALET 5

WARISAN

Pawos 47

1. Warisan inggih punika arta brana saha ayah ayahan ngutpadi sukerta sekala niskala sakeng Kaluhuranya harep ring sentananya.
2. Sane wenang kewarisin luwire :
 - a. Hamong amongan ring desa, ayah ayahan sa urah arih
 - b. Hutang Piutang
 - c. Seraja druwe, brana, tegal, carik, tatamian, sekancan kasugihan
 - d. Sehananing polih pitemes sakeng sang medruwe saluwir sane dados kawarisang, pinih akeh apah tigayan sakeng padruwen nyane maka piolah olih paguna kayan saha macihna lekita – pamikukuh sakeng guru wisesa.
3. Sane wenang ngawaris :
 - a. Manut lalintihan papernahan adoh tampek sakeng purusa tunggal sidi kara utawi tunggal-dadia
 - b. Putra Paperasan utawi putra dadaman
 - c. Mantu dadudukan, minakadi sentana sakeng nuduk mantu.
4. Sane tan wenang ngewaris :
 - a. Sapa sire ugi krama desa adat asak metilar saking agama Hindu
 - b. Sane alpaca guru rupaka

5. Sane wenang muponin warisan inggih punika:

a. Sentana luh sane durung merabian

b. Baluan istri sane oageh ngrajegang babaluan

6. Ngedum warisan sepatut sesampune puput upacara pitra yadnya, sang ngwarisan brana miwah kasugihan punika. Sane dados dum sajaba sane manggen pedagingan pangaci aci, salwiring sane mangge piranti nglaksana upacara agama, pustaka pusaka sane kapingitang sakeluwiripun.

SARGAH VII

WICARA LAN PAMIDANDA

PALET 1

WICARA

Pawos 48

1. Sane wenang mawosin mekadi mutusang wicara ring Desa Adat Asak inggih punika :

a. Pengrajeg

b. Kelihan Desa Adat

c. Prajuru Desa sinangeh Kertha Desa

d. Sabha Desa Adat

e. Kelian Banjar Adat

2. Salwiring indik Desa Adat, ring wewidangan Desa Adat Asak, wenang rinawosang antuk prajuru Kasarengin Kertha Desa lan Pengrajeg Desa, yan tan kasidan puput, ke lanturang ring Guru Wiwisesa, buat matetimbang.

3. Dudonan mawosin saha muputang wicara Krama Desa Adat kadi ring sor :

a. Kaping ajeng kebawosin ring Kelian Banjar

b. Katunasang ring Paruman Banjar

c. Yan tan kacumponin panepas bawose ngantos ring paruman banjar kengin nunasang ring Kelihan Desa Adat.

d. Kelihan Desa Adat kesarengin Kertha desa adat muputang wicarane, yan tan presida raris

matetimbang ring Pengrajeg, Sabha Desa lan Penglingsir Desa Adat.

E. Kelihan Desa Adat, Kertaha Desa, Pengrajeg Desa lan Penglingsir Desa tan side nepasin wicara Utawi tan kacumponin, wau katunasang ring Paruman Desa Adat maka Wasananing Patut.

4. Indik nepasin wicara kinucap, tan mari ngupadi dharma kawelasasihan, tur melarapan antuk-
Lekita, bukti, saksi saha tan maren mangda nepek ring sadaging awig awig, pasuwara miwah-
Pamutus perarem desa.

5. Yan pamutus wicara sane katiwakang antuk Prajuru Desa Adat Asak, tan katinutin utawi tan
kahiring antuk sang mawicara, wenang sang mawicara nunasang pamutus ring sang patut –
mutusang utawi ring Guru Wisesa yab wicarane liwarang kapin sukertan Desa Adat.

6. Yan Pamutus wicara Guru Wisesa pateh sekadi pamutus Desa Adat, presida sang mawicara-
tan kalugra ngangge sapadruweyan Desa Adat Asak, Dosane kewastanin mamandal ring Desa.

PALET 2

PAMIDANDA

Pawos 49

1. Luwir Pamidanda sane wenang katiwakang antuk Pengrajeg, Prajuru Desa, Banjar Adat, Subak

Sekaa sekaa sawewengkon Desa Adat Asak sakadi ring sor puniki :

a. Danda Arta

b. Danda Upasaksi, Dewa Saksi Pangrarata, Sumpah

c. Danda Panyangaskara luwire : Mrayascitta, Marisudda, Miwah Salwir ipun

d. Kanorayang

e. Kasepe kang saha Kaheladang

f. Pamidanda sawosan manut palugrahan Guru Wisesa.

2. Patiwak Pamidanda, manut unguwan wicarane soang soang minekadi wrat ringanwicara inu-
cap luwire :

a. Yan Wicara ring Desa Adat, yogya kapidanda antuk desa adat, mungguwing dedandan nge-

- ranjing ka Desa Adat.
 - b. Yan wicara ring Banjar Adat, yoga kapidanda ring banjar adat, dadandan ngeranjing ke banjar adat.
 - c. Yan ring Subak utawi ring Sekaa sekaa katiwakin danda ring kuwu tempeknya soang soang, mungguwing dadandan ngranjing ring kuwu tempeknya.
3. Agung alit dadandan ika, manut panglokikan agung alit wrat ringan kasisipane sane munggah ring Awig awig gegaduhan soang soang, minekadi pasuwara pinaka pamutus paruman.

Pawos 50

1. Krama sane langkung ring tigang paruman nglantur tan naur urunan miwah dadaandan wenang kerampag (ke danda nikel).
2. Rerampagan ngangge tata cara kadi ring sor :
 - a. Kalaksanayang antuk Prajuru kasarengi ring saya desane
 - b. Sang ngerampag sakeng darsana ngambil barang utawi tanem tuwuh, akehnya manut ring hutang sang kerampag.
 - c. Prajuru miteketang mangda barang sane karampag digelis katebus, masenger awuku ring arahina pacang ka adol.
 - d. Tan ngenenin saluwir barang sane patut inggilang manut agama miwah mademang pangu pa jiwa sang karampag.

Pawos 51

1. Prade sane pacang karampag ngalangin pemargi inucap mawastu sampun tan nganutin Awig Awig Desa wenang karang desa sane kagenahin kadaut antuk Desane utawi kasepekang.
2. Semalih yan purun taler ngalangin pamargi kadi ring ajeng tan wenten malih pamargin sawo san sajawaning kawaliang pipilnyane utawi kausanang makrama.
3. Yan Wenten Malih Krama sane mamuwuk tan kayun nganutin sapituduh Prajuru wenang kanorayang manut perarem Prajuru Desa.
4. Pamidanada inucap ring ajeng keni buntas rismpun sang kakenenin ngemargiang pemargi-

kadi ring sor puniki, nanging tan kadadosang malih dados Manggala/Pemimpin ring wawengkon Desa Adat Asak mangde nenten wenten malih saling wales mawesana rusak Dresta lan Awig awig sane sampun kasungkemin, buntas punika :

- a. Nunas Geng pangampura ring Krama Desa riantukan nguwak patibaya utawi perarem
- b. Nawur Pangargan Panguwak patibaya duk pacang karampag kadulurin guru piduka lan prayascitta.

SARGAH VIII

NGUWAH-NGUWUHIN AWIG AWIG

Pawos 52

1. Nguwah nguwuhin awig awig Desa puniki kamargiang antuk Paruman Desa.
2. Paruman inucap mangda kadasarin antuk pakarsan krama Desa Adat sane kamedalang antuk Sabha Desa Adat.
3. Sane wenang uwahin inggih punika, pasukertan, pamutus perarem, wiadin pamutus pasamuhan miwah sane sawosan sapanunggilanipun.
4. Sane wenang nguwuhin, inggih punika pasukertan, pasuwara, pamutus pasamuhan, miwah sane sawosan manut sapanunggilanipun.
5. Indik nguwahin lan nguwuhin pasukertan, pasuwara, pamutus perarem wiadin pamutus pasamuhan miwah sane sawosan manut tata kramaning paruman.
6. Indik nguwahin kalih nguwuhin awig awig, manut tata kramaning paruman sasampun nunas – tatimbang ring Guru Wisesa kalih polih palugrahan sang Amawa Rat.
7. Awig awig puniki kemargiang ngawit kaingkupin utawi Kararemin.

Pawos 53

1. Saklewiring sane wenten sedurungnya patut ka anutang ring sadaging Awig awig puniki.
2. Saakewiring sane durung kabawos ring Awig awig puniki patut kemargiang manut tata cara sane sampun ketah memargi kadulurin antuk perarem perarem.

SARGAH IX

SAMAPTA

Pawos 54

1. Awig Awig Puniki mawasta Awig Awig Desa Adat Asak

2. Awig Awig puniki pinaka bantang sehananing awig awig, pasuwra, pasukertan miwah salwir-
ipun, sane mangge ring soang soang tempek, Banjar Adat, Pamaksan Pura, Sekaa sekaa sane-
wenten sajeroning Desa Adat Asak.

3. Banjar Adat utawi Pauman, Pemaksan utawi Dadia, Subak, Sekaa sekaa sane wenten ring
sajroning Desa Adat Asak wenang ngewangunan awig awig, pasukertan, pasuwara, gagduhan
soang soang, nanging dagingipun tan yoga singsal, tungkas ring awig awig Desa Adat Asak.

4. Salewiring sane durung munggah ring awig awig puniki ka unggahang sajeroning pasuwara,-
pamutus pasamuhan/Paruman Desa Adat Asak.

5. Dresta Kuno kantun ka angge maka dasar wentene Awig awig puniki, duwaning nenten tung-
kas ring Sastra Agama Hindu tur kantun ke angge kemargiang ring Desa Adat Asak taler nga-
nutin uger uger Negara, saha kaputusan sajeroning Paruman Desa Adat Asak.

6. Awig Awig puniki kasungkemin paruman Krama Desa Adat Asak duk Rahina, :
Saniscara Kajeng Pahing Wuku Mrakih, Sasih Kelima, Icaka Warsa 1942.

Tanggal 07 Bulan Nopember, tahun 2020 Ring Bale Agung Desa Adat Asak

Kapuput Antuk Ida Pedanda :


Sakeng Griya :

7. Awig Awig puniki kalingga tanganin antuk Pengrajang Desa Adat Asak, Kelian Desa Adat Asak,
Lan Saba Desa Adat Asak.

8 Awig Awig puniki kalaksanayang utawi kemargiang ngawit dina Kaplaspas kantos kapungkur.


Desa Adat Asak, 07 Nopember 2020

Kelian Desa Adat Asak





(I Ketut Suta)

an. Pengraja Desa Adat Asak



(I Nengah Wasista Budi Utomo)

an. Saba Desa Adat Asak



(I Nengah Merti Aryasa)